


# KUKWENDA YA KINTULUMUKINA, YA KINSWEKI YA DIBUUNDU

 Yina lendaka sala ti muntu nionso kuwa mbote, ya lendaka ve, nkotolo mutindu yina? Mbote mingi. Beto kulumusa bayintu ya beto na mwa ntangu fioti ya kisambu na ntwala beto zibula Ndinga.

<sup>2</sup> Mfumu, beto ke tuba mutindu bayayi ya ntama, “Mu vwandaka na kyese ntangu bawu tubaka, ‘Beto kwenda na Yinzo ya Mfumu.’” Beto lenda kuzwa ve kisika ya kulutila mbote na kuvwanda, bubu yayi, kulutila kuvwanda kaka awa na dibuundu ya Mfumu, samu na kusambila. Ata ti mvula ke noka, na ngaanda, mpe ya lendaka vwanda na bampasi mpe nionso yina, kasi ntangu beto kele na Mvwandulu ya Nge, beto ke na kiesee yayi, yina beto zaba ti Nge me bakula mpe ke sala nionso mbote samu na beto.

<sup>3</sup> Beto ke lomba lusakumunu ya mutindu yankaka na suka yayi na bayina vwandaka ve ya kulunga na kukuma na lukutakanu. Mingi, mu banza, zolaka kwiza kana ntangu vwandaka ve yimbi mingi. Kasi bika bawu kuzwa kubomba na kutangaka Ndinga ya Nge, mpe ke kuwa milongi na ladyo, mpe manaka yina ba salaka samu na bantu yango.

<sup>4</sup> Beto ke lomba ti Nge ke sakumuna mingi bayina kele na kati ya Mvwandulu ya Kinzambi, samu na ngolo ya bawu ya kubasika na suka yayi, samu na kuwa Ndinga ya Mfumu, mpe samu na kulonga Yandi na Psaumes mpe na—na kisambu, mpe na kuvutula matondo.

<sup>5</sup> Mpe beto ke lomba, Nzambi, ti Nge ke simba banzutu ya bayina kele ya kubela mpe kele na nsatu, yina ke na kuvingila na ntangu yayi, yina me katuka na bisika ya ntama samu ba sambidila bawu.

<sup>6</sup> Mpe beto ke lomba ti Nge ke tala kaka na zulu ya beto, mpe ke lomba na beto, ti beto yina kele awa na suka yayi lendaka sala kizama ya diambu ya beto mosi. “Tala munu,” tubaka mosi ya baprofete, “mpe meka munu, mpe tala kana ya kele na mpeve ya yimbi na kati ya munu.” Mpe kuna, Mfumu, na kusosa-sosa, kana Nge mona ti ya kele na yimbi na kati ya beto, vedisa beto, Mfumu, na yina beto ke funguna masumu ya beto nyonso mpe bayimbi ya beto ya yimbi.

7 Mpe beto ke lomba kaka ti Nge ke bambuka moyo na beto mutindu Nge ke tala na Yesu, Mwana ya Nge, Yina kufwaka samu na kuvwanda munkayulu samu na masumu ya beto mpe disumu ya beto ya nku. Mutindu beto ke funguna ti beto ke kwikila ti Yandi kufwaka samu na lukanu yayi, mpe vumbukaka diaka, ti beto ke kuzwa bweso ya nene ya kusala yayi, na suka yayi. Pesa yawu, Mfumu.

8 Mpe tuba na beto na nzila ya Ndinga ya Nge yina ba sonikaka, na yina beto ke vingila na kuwa ntama na Nge. Na Nkumbu ya Yesu beto ke sambila. Amen.

9 Beto zola baka Masonuku na suka yayi samu na kutanga na Buku ya ba-Théssalonicien, kapu 5. Mpe mu kele na bayina kele na balombilu ya bisambu diaka, na suka yayi, na liste. Na yina, kisambu ke salama mbala mosi na manima ya kisalu yayi ya kulonga. Mu ke kwikila, kaka mwa ntangu fyoti, samu na beno bayina ke na kuzibulaka Babiblia ya beno, beto baka ba-Théssalonicien ya Ntete kapu 5, mpe beto tanga kaka mwa ntangu fyoti.

10 [Mpangi mosi ya bakala me tuba, “Benó katula bakalasi ya lukolo ya Lumingu.”—Mu.] Benó lemvokila munu. Na yina beno ke na kuzibulaka Biblia ya beno, ya kele. . . ba me katula ntete ve bana na bakalasi ya bawu ya luvunu. Benó zola kwenda kaka na ntwala ntangu yayi na bakalasi ya beno, beno bana ya fyoti mpe bantwenya, mpe nyonso yankaka yina. Kwenda mbala mosi na bakalasi ya beno.

11 Mpe na yina, kana beno lenda ntangu yayi, beno tanga, to beno zibula Babiblia ya beno na ba-Théssalonicien ya Ntete kapu ya 5.

12 Mpe kana ya lendaka salama ti conseil ya ba-administrateur kele awa na ntangu yina, Mu ke zola kumona bawu kaka mwa ntangu fyoti na manima ya lukutakanu, na bureau ya badiakre, samu na dyambu mosi. Mpe kana bawu kele ve mutindu yina, muntu mosi kubaka ndinga yina mu ke zola kumona bawu na nkokila yayi, kaka na ntwala ya kisalu, na bureau ya ba-diacre.

13 Ntangu yayi samu na dilongi mosi, mu zola baka yayi mutindu yintu ya dilongi na suka yayi: *Kukwenda Ya Kintulumukina, Ya Kinsweki Ya Dibuundu.*

14 Bika mu. . . bika mu zabisa yawu diaka, samu mu kuzwaka ve ntangu mingi samu na kufyongonina na zulu ya bansamunu mosi, kasi mu vwandaka kaka na nswalu. Beto basikaka na manima ya ntangu mazono, beto vutukaka ata fioti ve mazono na nkokila tii na manima ya ntangu. Mpe na nswalu awa na suka yayi, kasi yayi me kwiza kaka na dibanza ya munu. Mpe mu banza, na ntwala, mu lendaka kuzwa kima yina ke sala muntu mbote. Mu zola dilongi yayi, “Na mbala mosi, kinsweki ke na kutalaka na Dibuundu.” Mpe ntangu yayi na Théssalonicien kapu 5.

*Kasi samu na yina me tala bantangu mpe ya bansungi, bampangi, beno kele na nsatu ve ti mu sonika na beno.*

*Samu beno beno mosi zaba mbote ti kilumbu ya Mfumu ke kwiza mutindu muyibi na kati ya mpimpa.*

*Samu ti ntangu bawu ke tuba, Ngemba mpe lukengolo; na yina na kintulumukina bakubeba ke kwisa na zulu ya bawu, mutindu mpasi ya kubuta na zulu ya kento yina kele na kivumu; mpe ba ke tina ve.*

*Kasi beno, bampangi, kele ve na kati ya mpimpa, ti kilumbu yina zolaka kwisa na beno mutindu muyibi.*

*Beno kele . . . bana ya nsemo, mpe bana ya kilumbu: beto kele ve mpimpa, to ya mudidi.*

*Na yina beto lala ve, mutindu ke salaka bayankaka; kasi beto tala mbote mpe beto vwanda ya kutatamana.*

*Samu ti bayina kele ya kulala ke lalaka na nkokila; mpe bayina kele ya kulawuka malafu ke lawukaka malafu na mpimpa.*

- 15 Ntangu yayi mu zola ti beno tala kaka na lweka yankaka ya page, kana ya kele kieleka ya kutula mutindu mosi na kati ya Biblia ya beno, tii na 16, 17 mpe 18 ya kapu 4 ya Ntete ya Thessaloniciens.

*Samu Mfumu yandi mosi ke kulumuka na zulu na kuboka, mpe na ndinga ya archange, mpe na muningu ya Nzambi: mpe bantu ya kufwa kati na Klisto ke vumbuka ntete:*

*Na yina beto yina ke vwanda ya moyo mpe ke bikana ke zanguka kintwadi na bawu na matuti, samu na kukutana na Mfumu na mipepe: mpe mutindu mosi beto ke vwanda na Mfumu.*

*Na yina beno pesana kikesa mosi na yankaka na bandinga yayi.*

- 16 Bika ti Mfumu kubwela balusakumunu ya Yandi na ntangulu ya Ndinga ya Yandi ya santu.

- 17 Yayi kele kima ya mumesanu ve, samu na kuzonzila dilongi ya mutindu yayi na suka yina mu kwisaka na—na kulonga na bambevo. Kasi ya kele na kimbevo ya kulutila nene na kimbevo ya nzutu. Mpe ya kele mfunu kulutila mingi ti beto vwanda mbote, samu na diambu yayi ya nene yina ke zola kusalama, ti ya ke vwanda ya kulala na Mfumu, ya kele, ya kufwa, mutindu beto ke zaba yawu. Ya kele mbote na kuvwanda ya kukubama. Mu ke zola kuvwanda mbevo, ya kukubama na Mfumu, na kisika ya kuvwanda bakala ya mbote, ya kukubama ve na kukwenda na Mfumu. Kasi na mutindu nyonso ya ke vwanda, Nzambi zola mingi ti beto zole kuvwanda mbote mpe ya kukubama, moyo mpe nzutu. “Samu ti Yandi ke lemvokila masumu ya beto nyonso ya

nku, mpe ke belusaka bimbevo ya beto nyonso.” Yandi kufwaka samu na lukanu mosi.

<sup>18</sup> Mpe na yina, mu ke banza bubu yayi na zulu ya dilongi yayi, “Na mbala mosi, mpe kinsweki.” Mu zola yawu. Nzambi. . .

<sup>19</sup> Bantu ke zinga bubu yayi mutindu ti, kaka na ntwala ya Nkwizulu ya Mfumu Yesu, kana Yandi zolaka fidisa basoda ya Bawanzio na bazulunale nyonso, mpe, samu na mvula mosi to mutindu yina, zabisa yawu na yinza ya muvimba, na zulunale, ti, “Kilumbu *yayi-mpe-yayi*, Yesu ke kwiza.” Mpe yawu fwana vwanda na luzabusu na nzila ya radio, mpe ba ke zibula ba-televizyo, mpe bisika nyonso, kaka kilumbu mpe kaka ngunga yina Yandi vwandaka kwiza. Ntangu yayi ya kele mutindu bantu ke zinga bubu yayi.

<sup>20</sup> Kasi, Nzambi tubaka na kati ya Ndinga ya Yandi, ti, “Ya ke vwanda mutindu muyibi na mpimpa, yina ke kwisa.”

<sup>21</sup> Kana ya ke vwanda mutindu yina, bantu ke tuba, mutindu yinza ke banzaka bubu yayi, “Oh, mbote, ya kele kaka na ntangu mingi. Mu ke. . . Ba ke zabisa yawu mbote.” Mpe, kasi, beno me mona, ba zabisaka yawu na ntwala, kasi ya kele kinsweki ke zabisa yawu. Ya kele kaka bayina ke zolaka kuwa yawu. Bayina ke zolaka kutala yawu mpe na. . . bayina ke zolaka Mfumu.

<sup>22</sup> Mu banza ntangu yayi na yina Paul tubaka ntangu yandi tubaka, “Ya kele na yimpu ya ludedomo yina ba me tula samu na munu, ti Mfumu, Zuzi ya kusungama ke pesa munu kilumbu yina.” Mpe na manima yandi telemaka. Beno me bakula? Mpe yandi tubaka, “Munu kaka ve, kasi na bayina nionso ke zolaka kumonika ya Yandi.” Kana beto zola kumonika ya Yandi!

<sup>23</sup> Ntangu nyonso na yinza bubu yayi, bantu ke banzaka na kumonika ya Mfumu mutindu kima ya boma, ya boma. Oh, yinza lendaka kwiza na ya yawu. . . “Kuzonzila munu ve na yina me tala yawu,” ba ke tuba. Bawu zola ve kuzaba na zulu ya bima yayi. Ba kipe yawu ve; kaka na kilumbu yayi beto ke na kuzinga. Kasi bayina ke zolaka Mfumu, ke zolaka kumonika ya Yandi.

<sup>24</sup> Yinki ke salama kana mosi ya beno ya luzolo, bayankaka na kati ya beno biboba, ti mama ya nge kwendaka, to tata ya nge, to bébé ya nge, mpe ba vwandaka ntama bamvula mingi, mpe beno zabaka ti ba lendaka monika na ntangu nyonso? Na yina, beno zolaka kuzwa yinzo nyonso ya kusukula. Beno ke vwanda kaka ya kukubama mpe ke tala kaka na nzila yina, samu ti, konso nsemo yina balukaka, beno ke banza ti ya ke vwanda bawu.

<sup>25</sup> Ntangu yayi ya kele mutindu yina Dibuundu fwana vwanda na kutala mbote Nkwizulu ya Mfumu. Nyonso na ndonga, nyonso ya kukubama, nyonso ya kukutika mpe ya kukubama mbala mosi ti Yandi ke kwisa, samu, “Ya ke vwanda na ntangu mosi, na mbwetolo ya disu.” Beno meka kaka na kutala ntangu wapi ntangu ya ke baka disu ya beno na kubweta, ya kele kaka nswalu Enlevement ya Dibuundu ke salama.

<sup>26</sup> Beno zaba, mbeni ke sadilaka ntangu nionso batikitaki yina—yina Mfumu ke sadilaka. Beno zaba, ntangu yandi monaka ti Nzambi zolaka kuzwa Dibuundu ya kusungama, mpe bima yina Yandi zolaka sala, mbeni sadilaka tiki- taki mosi yina. Yandi kele na dibuundu, mpe yandi kele na bantu yina kele kieleka misambidi. Mpe bawu kele kaka na musapi, mutindu—mutindu misambidi, samu yandi zaba ti Dibuundu ya Klisto kele mutindu mosi.

<sup>27</sup> Mpe yandi salaka yawu na ngaanda ya luzingu ya basoda. Mu vwandaka tanga zulunale mosi mwa ntangu fioti me luta, na zulu ya ataki na Pearl Harbor. Ya me vwandaka ve, kieleka, ataki mosi ve yina me zabana. Ba kebisaka bawu na ntwala ti ba-Japonais vwandaka kwisa samu na kusala yawu. Kasi kitini ya mawa vwandaka, bawu zabaka ve malongi yina. Bawu monaka bidimbu, mpe makesa ya Japon kuvukanaka bawu mosi kintwadi, mpe ba vwandaka fulusa bamasuwa ya nene na manduki, ntitisa vwandaka na mipepe. Mpe bawu vwandaka kaka kieleka na nzila samu na kuyala, kasi bawu zabaka yawu ve.

<sup>28</sup> Ya kele mutindu ya kele bubu yayi na dibuundu. Dibuundu kele na nzila ya lufundusu, kasi bawu ke zimbana Nkwizulu ya Mfumu. Na yawu ti beno lenda ve kusemba Yandi.

<sup>29</sup> Bawu tubaka, ntangu makelele panzanaka, na nziunga, na kati ya Pearl Harbor, ti ba-Japonais lendaka nwanisa na konso ntangu yina, mpe ti masuwa ya bawu ya nene kwendaka na kati ya bamasa ya mubu mpe vwandaka tambula malembe kasi na kieleka na ntwala ya Pearl Harbor, ti bawu sekaka kaka yawu. Mpe bawu tubaka, “Ah, buzoba. Beno mitungi ya kyadi. Beno bantu ya boma na maboko ya ngolo. Nyonso beno ke banza na zulu ya yawu kele mwa bampasi.”

<sup>30</sup> Mpe na nkokila, kaka na ntwala ya kunwana ya nene na suka yina landaka, ya vwandaka na makinu ya nene, to feti mosi ya nene yina ba pesaka na Pearl Harbor yawu mosi. Ata ti wapi mutindu bawu mekaka na kutuba ti ba-Japonais vwandaka kwisa, bawu zolaka ve kaka kubaka dikebi.

<sup>31</sup> Beto tala kaka na zulu ya bawu baminuti fyoti. Ya kele na mwa bansangu ya ladyo yina ke basika. Mpe mwa kitini na nsongi ya mukanda, mutindu ba ke zabisa campagne ya kubeluka ya nzutu, kaka kisika ya fyoti, ti ba-Japonais vwandaka na nzila ya bawu na kati ya bamasa ya mubu, masuwa ya nene vwandaka kwisa na ntwala mutindu yina. “Buzoba,” me tuba bayankaka. “Beto ke kwikilaka ve na kima ya mutindu yina. Yinki nge ke meka na kupesa beto boma?”

<sup>32</sup> Mpe na yina beto ke mona, beto ke kuma pene-pene ya nkokila, Mu lenda mona na yinzo, na kisika ya bawu ke na kukubama samu na kubasika na mbanza, na yina, bana-bakento ya bantwenia vwandaka tula bansongi ya bawu ya malu-malu,

mpe nionso yina. Ba vwandaka kwenda na jubilé yayi ya nene ba zolaka kuzwa.

<sup>33</sup> Mpe, dyaka, bisadi ya Makesa vwandaka kaka na kizitu ya kusonika mwa ba-passe samu ti basoda lendaka kwisa na feti yayi, feti ya nene ya kulawuka malafu. Mpe batomabilu vwandaka sala makelele mpe vwandaka komvula, na kukotisaka malafu ya bawu ya kulutila kitoko, mpe vinu ya bawu mpe bima, samu na feti yayi. Mpe bantangu nyonso, masuwa ya Japon vwandaka na nzila ya yawu kuna, mpe kondwaka kuwa dikebi.

<sup>34</sup> Mpe mutindu mwini bandaka na kusala, mpe bawu nyonso kuvukanaka na kati ya bidimbu yayi ya nene ya kisika mosi. Mu banza na lweka kisika mosi kuna, barman vwandaka lengula nganda to kima mosi, yandi tubaka kima mutindu yayi, “Tuba, nge kuwaka manguni-nguni?”

“Ve, mu ke kwikila ve ti mu salaka yawu,” yandi tubaka ti bakala yina yandi tubaka.

<sup>35</sup> “Oh, ba ke na kutuba samu na masuwa ya Japon ke na kukwisa mutindu yayi.” Mpe na yina muntu yankaka ke kota na disolo.

<sup>36</sup> Mpe ntwenya mosi, mwana ya kento ke dumuka kuna na zulu, mpe me tula makulu ya yandi na zulu ya nganda, tubaka, “Beno bantu ya bansuki ya ndombi, beno zaba ve ti beto kele awa samu na kuzwa ntangu ya mbote mpe kuzonzila mvita ve?”

<sup>37</sup> Kana ya kele ve kaka mutindu yinza ke tubaka bubu yayi na yina me tala Nkwizulu ya Mfumu! “Beno bantu ya mutindu ya ntama, na bantalu, yinki ke sala beno kulwata mpe kusala mpe kusala mutindu beno ke sala?” Kasi beto ke na kuingila kinsweki yina, na mbala mosi na kumonika ya Mfumu. Samu ti ya kele na kima mosi na zulu, Nsangu ya Mpeve-Santu, yina ke tubaka na beto ti Nkwizulu me belama.

<sup>38</sup> Na yina ntangu feti ya nene kusalamaka, mpe, oh, ya zolaka vwanda kima mosi ya boma na nkokila yina. Samu ba me tuba ti na ntangu mosi na kati ya mpimpa, bawu bakaka ntwenya mosi ya mama, mwana ya kento ya kitoko mingi, mpe ba katulaka yandi bilele, mpe ba tulaka yandi na kati ya mwa pusu na kaleso kaka na zulu ya yandi, mpe yandi kimaka mbangu na bala-bala mpe nyonso yina, yandi vwandaka kaka na ntangu mosi ya nene. Mpe na bantangu nionso, Japon vwandaka baka bantoto, ya vwandaka kwenda na ntwala.

<sup>39</sup> Mpe na yina na suka yina landaka, ntangu bantu na kisika ya kosalu, mpe ba-pepo vwandaka tala mbote, mpe nionso yina, na kuvwandaka kuna mpimpa nyonso, ya kulawuka malafu, mpe vwandaka tambula bisika nyonso na bakento yayi mpe nyonso yina, ba vwandaka zembuka mingi mpe na kidi-kidi na suka yina landaka, ba katukaka na feti ya nene, tii bawu vwandaka kulala kuna na kosalu.

40 Mpe mu kele na boma ti ya ke vwanda mutindu mosi na Nkwizulu ya Mfumu. Dibuuundu me natama mingi mpe me lawuka mingi na bima ya yinza, tii bawu ke lala na kisika ya kisalu, na Nkwizulu ya Mfumu.

41 Mpe kuna na zulu ya mbanza bapepo pumbukaka, mpe ba-bombe kubwaka, mpe bawu bebisaka mbanza yina, tii na ntoto. Samu na yinki? Samu ti bawu zolaka sala keba ve na kukebisa. Mpe ntwenya ya mama yina, kintwadi na bayankaka na kati ya bawu, ntangu ba-Japonais yayi, basoda ya ngolo kotaka na kati kuna, ba nataka bawu na bala-bala, mpe zengaka bawu bitini-bitini na bambele, na manima, mpe nyonso yina. Samu ti kana beno ke sala keba ve, ya kele kaka na kima mosi me bikana, ya kele lufundusu.

42 Oh, kana ya vwandaka na ntangu yina Amerika yayi vwandaka ntete na yawu ya kele yisi mingi, kaka ntangu yayi, ya mansoni ya yawu, ya kukondwa kukipe diambu ya yawu! Nsangu ya mbote me longama kubanda simu yina. Mpe bidimbu mpe mambu ya ngitukulu me salama. Mpe bimangu ya nene salamaka, mpe bawu landilaka na kukwenda na ntswala na kati ya bisengu ya bawu, kunwa malafu, kukondwa kuzaba, na kusekaka.

43 Na kati ya bankama zole ya ba-chaire na Amerika, ya mabuundu ya ba-Protestant, yina beto ke na yawu nsatu bubu yayi na ba-chaire yina kele baprofete ya Mfumu, yina kele ve na boma ya kupanza binzenzi ya Nzambi ya lufundusu na zulu ya nsungi yayi ya bantu ya masumu yina beto ke longaka. Beto ke na nsatu ya baprofete mutindu Esaie yina bokaka mpe tubaka, "Nsungi ya yimbi!" Mpe wapi mutindu ti yandi fundisaka nsungi yina, mpe tubaka na bawu samu na balufundusu yina ke na kwisa.

44 Kasi, bubu yayi, mingi ya milongi ya beto kele na boma ya kutuba bima yango. Bawu kele na boma na kupesa mbala mosi kimbangi ya dikebi, samu yawu ke kuta mwa bisalu ya bawu. Ba zolaka bika denomination ya bawu, kubika ba-chaire ya bawu. Mpe ba zolaka ku—kubasika, mu banza, mpe kubaka yankaka kutelama na dibuuundu mosi yankaka to kima mosi. Kasi ya kele kaka yimbi mingi ti beto kele na bantu ya mutindu yina na ba-chaire ya beto.

45 Beto kele na nsatu ya bantu mutindu John Wesley, ya kusungika ya ntete, Martin Luther. Beto kele na nsatu ya bantu mutindu Paul, bayina zola kupesa nyonso, mpe samu na kukipesa bawu mosi, ata mpe kana ya zola kutuba kukabwana na luzingu yayi, mutindu mbandi ya Nsangu ya mbote ya kieleka ya Yesu Klisto.

46 Yinki ya kele, bubu yayi, ti ndongosolo mpe ba-société mpe bima ya kuzatuka, ya mbote ya ba-société, mpe bansatu ya bawu mosi, me baka kisika ya Mpeve-Santu na kati ya dibuuundu.

47 Yina beto ke na yawu nsatu, bubu yayi, samu na kuboka na Amerique, kele bantu yina Nzambi tindaka, bantu ya kufuluka na Ngolo ya Mpeve-Santu, yina kele ve na boma ya kutelemina kima yina kele yimbi, mpe samu na kukebisa bantu na lufundusu yina ke kwisa.

48 Nzambi lendaka ata fioti ve kubika yinsi yayi kutina lufundusu. Kana Nzambi zolaka sala mutindu yina, Yandi zolaka vumbula Sodome na Gomorrhe, mpe ke lomba bawu pardo samu Yandi dindisaka bawu, samu ti bawu vwandaka bantu ya yimbi. Beto kele ve—ve na ntwala ya Nzambi. Yina beto me kwisa bubu yayi, ntangu ya me kuma politiki ya beto, ntangu ya me kuma na luyalu ya beto, ya kele ya kupola, kubanda na dikunzi tii na poto. Ya kele dyaka ve na ludedomo, kaka na Nzambi.

49 Oh, beto ke tuba ti beto ke tulaka ntima na zulu ya Nations Unies, ba-Nations Unies. Mpe mbote mingi kulutila bamvula tanu me luta, bawu vwandaka makumi tanu na mosi na zulu ya nkama mosi ba-communiste, ya bayinsi na kati ya Nations Unis. Ya kele na kima ve yina ke talaka na zulu kasi Ndinga ya Nzambi ya moyo. Beto lenda tula ntima na kima mosi ve ntangu yayi, ata politiki ve.

50 Mu vwandaka na bakumekama bangonda tatu to yiya ya nsuka, na yisi ya tiya ya kizitu, na kumekaka na kufunda munu na kusalaka kima yina vwandaka yimbi, na kulutisaka mbongo na tabernacle yayi awa, samu na balukutakanu. Na yina, conseil ya beto ya ba-administrateur awa me sonika nsamunu yayi. Mpe ya kele ve na muntu yina me vwandaka ntete na balukutakanu ya munu kasi yina mu zabisaka na ntwala ti ba bakaka mbongo yayi na ya beto. . . na balukutakanu ya munu, ba zonzilaka yawu na dibuundu yayi. Mpe ntangu yayi bawu ke tuba, samu ti mu tulaka yawu na nzila ya dibuundu, mu vwandaka meka na kukotisa poto-poto na luyalu, mpe ba zola kupesa munu bamvula makumi zole na Fort Leavenworth, Kansas, samu na yawu.

51 Mu tubaka, “Yinki mpova yayi sonikaka na bayinzo ya beto—ya beto ya lufundusu, ‘Ludedomo’? Ya zola kutuba mingi ve ti ba sonikaka yawu ve kuna.” Yandi tubaka, “Ntangu bantu ya nge mosi tubaka na munu na kusala, mu salaka yawu. Mpe ntangu yayi beno ke tuba ti bawu kele diaka ve na luyalu. Wapi mutindu beno lenda? Beno ke sukisa dyambu mosi mpe ke lakisa yawu, na yina awa bawu ke timuna kima yankaka.” Yina kaka ve, kasi bawu ke yenga-yenga.

52 Mu salaka nsamunu yayi na cour fédérale. Mu tubaka, “Kana communisme vwandaka na Buklisto na kati ya yawu, mu ke vwanda communiste.” Kasi mu lenda vwanda ve, samu ya ke manga Buklisto.



53 Na yawu mu ke na diboko mosi ya kusimba, ya kele diboko ya Nzambi yina ke sobaka ve, na kuzabaka ti Yandi ke zitisa kieleka mpe ke zitisa. Ya fwana basika, na ludedomo.

54 Kasi beno zaba ti ya kele ve na kivuvu kisika mosi, kaka na Nkwizulu ya Mfumu.

55 Oh, ya kele kilumbu yina beto ke na kuzingila, ntangu mosi ya mpassi! Ntangu, konso kima ya nzutu, ata mpe dibuundu yawu mosi, bantu ya dibuundu, ba-denomination ya dibuundu, bawu ke kipaka mingi mwa—mwa baluswaswanu ya bawu, tii bawu ke bundanaka ve mosi na yankaka, mpe na kubakaka ve kukebisa ti Nkwizulu ya Mfumu me kuma pene-pene.

56 Bantu mutindu Billy Graham, mpe Jack Shuler, mpe Oral Roberts, mpe mingi ya ba-evangeliste ya nene, mpe Charles Fuller, yina me basika na yinza ya muvimba, bawu ke sala nyonso yina bawu lenda, samu na kukebisa Nkwizulu ya Mfumu. Mpe bantu yango mosi, bantu yango yina ke mekaka na kusala mbote, kele bantu yina luyalu ya beto mosi ke mekaka na kubebisa.

57 Mu tubaka na muntu mosi, “Tata, bamvula makumi zole na nana ya luzingu ya munu, mu me lalaka na autel ya Nzambi, samu na kumeka kusala mbote. Mpe mu zola muntu kutala munu na meso, mpe beno tuba na munu kana mu me bula muntu mosi na kima mosi, to mu me yibaka ntete kima mosi na luzingu ya munu. Na lemvo ya Nzambi, mu kele pwelele.”

58 Yina zola kutuba mingi ve, samu na yawu, kulutila musapi ya beno. “Beni kele ya kubwa, na mutindu nyonso! Mpe beno kele ntwadisi ya nkú na kati ya dibuundu ya beno! Nge ke bweta musapi ya nge mpe dibuundu ya nge ke sala yina nge ke tuba na bawu na kusala!”

“Oh,” mu tubaka, “wapi mutindu bantu ya yimbi lenda vwanda?”

59 Yandi tubaka, “Nge pesaka bantu makabu ntangu bayinzo ya bawu vwandaka yokama. Beni tala ba-chèque ya beno kisika beno ke pesaka mifwidi ya bakento bankama ya ba-dollar, mpe ke futaka mbongo ya bawu, mpe ke sala bima ya mutindu yina.” Yandi tubaka, “Beni kwendaka na kimvuka ya dibuundu ya beno mpe beno tuba na bawu ti beno ke sala mutindu yina?”

Mu tubaka, “Ve, tata.”

“Samu na yinki nge ve?”

60 Mu tubaka, “Mfumu tubaka na munu, na Ndinga ya Yandi, ‘Kubika ve diboko ya nge ya kibakala . . . diboko ya nge ya kikento kuzaba yina ke na lusala diboko ya nge ya kibakala.’”

61 Yandi tubaka, “Na yina nge ke meka na kutubila diambu ya nge na nzila ya Biblia, mpe beto ke fundisa nge na nzila ya musiku.”

62 Mu tubaka, “Yinki kele musiku ya kulutila zulu, muntu to ya Nzambi?” Mu ke baka musiku ya Nzambi.

63 Kaka mwa, bamvula zole me luta, mu vwandaka na konze ya munu, mu vwandaka vutuka na nzila.

64 Awa na Indiana misiku ya mbangu kele bakilometele makumi sambanu na tanu na ngunga mosi na ntangu, mpe yina kele na bala-bala ya nene, bala-bala ya kimpwanza. Mpe ya kele bakilometele makumi sambanu na tanu na ngunga mosi na nkokila, na manima mwini ke kulumuka. Ya kele mutindu yina na Kansas. Ya kele mutindu yina na Illinois. Ya kele mutindu yina na Colorado. Ya kele mutindu yina na Idaho. Ya kele kieleka na Wyoming.

65 Mpe na kuvutuka ya munu, na manima ya kuvwanda na kati ya kitembo ya mvula-mpembe bilumbu mingi na kati ya kitembo ya mvula-mpembe; mpe mu kuzwaka kaka wapiti mosi, mpe mu vwandaka na nzila ya munu na yinzo, samu na kupesa yawu na bankundi ya munu. Mpe mu zolaka sala nswalu samu na kumeka kubula kitembo yankaka ya mvula-mpembe vwandaka kaka na manima ya munu, to mu zolaka vwanda dyaka, mpe musuni zolaka bebisa.

66 Mpe mu sabukaka kuna na Wyoming, mpe kwisaka kuna na Nebraska. Mu vwandaka pene ya bakilometele makumi yiya na nana, na kati, ya nzila. Mpe na mbala mosi, mu talaka na manima, mpe mu monaka pulusu ya mbwaki kele nsemo ya mbwaki. Mpe mu me kuzwaka ntete ve tiya na luzingu ya munu. Na yawu, mu landilaka kaka. Mu talaka na yisi, mu vwandaka sala bakilometele makumi yivwa na tanu na ngunga mosi, ntama kuna na . . . bakilometele makumi yiya na nana to bakilometele makumi sambanu na yiya katuka na—na konso mutindu ya mbanza. Mpe mu vwandaka kulumuka kuna na bala-bala ya nene, bala-bala ya nene ya banzila yiya. Mpe, mu talaka, bakilometele makumi sambanu na nana na ngunga mosi. Mu talaka na manima, mpe yandi landilaka na kuvwanda na manima ya munu. Mpe mu vwandaka tala kaka mbote.

67 Mpe mu monaka nsemo ya mbwaki, mpe mu banzaka, “Mbote, samu na yinki yandi ke luta munu ve? Yandi kele na bivinga mingi.” Mpe mu landilaka na kuingila. Mu kimaka mbangu na nela ya munu, mpe mu kuwaka kisita. Mbote, mu banzaka, “Mu me kuma na nsuka.” Mpe yandi balukaka mpe telemisaka munu.

68 Mu basikaka na ditoma. Mu banzaka, “Mu banza ti ya kele na nsangu mosi yina mu bakaka ve na ladyo, mu banza na yinzo, kento ya munu to dibuta ya munu.” Mpe mu basikaka na ditoma yina, mu zabaka diambu ve mutindu mu lendaka vwanda.

Yandi tubaka, “Mu banza ti nge ke kukiyufula samu na yinki mu me sukisa nge?”

Mu tubaka, “Yinga, tata.”

69 Mpe yandi tubaka, “Nge vwandaka kabula misiku ya mbangu.” Yandi tubaka, “Nge zaba mutindu nge vwandaka kwenda mbangu?”

Mu tubaka, “Yinga, tata.” Mu tubaka, “Mu vwandaka tambula bakilometele makumi sambanu na nana na ngunga mosi.”

Yandi tubaka, “Ya kele kieleka. Mpe ya kele kutelemina musiku.”

Mu tubaka, “Ya kele ve makumi sambanu na tanu na . . .?”

70 “Ve, tata.” Yandi tubaka, “Ya kele na makumi tanu na tanu awa. Nge vwandaka sala bakilometele nana na zulu ya ndilulu ya mbangu.”

“Oh,” mu tubaka, “Lemvokila munu. Mu zolaka yawu ve.”

71 Mu tubaka, “Pesa munu muswa ya munati-ditoma. Talisa munu muswa ya nge.”

72 Mpe mu bakaka yawu na posi ya munu. Mpe kaka na ntangu yandi monaka mpova yayi ‘révérend,’ meso ya yandi vwandaka pela na tiya. Yandi bakaka buku ya yandi mpe bandaka na kusonika munu tike ya ba-dollar makumi zole na yiya mpe makumi tanu ya ba-centime.

Mu tubaka, “Nge ke pesa munu tike?”

Yandi tubaka, “Nge kele ya kusungama! Mu ke pesa nge tike!”

“Mbote,” mu tubaka, “tata, ya kele nyonso ya kulunga. Kasi mu monaka kima ve.”

73 Yandi tubaka, “Oh, ya kele na kidimbu kaka na ngaanda ya nzila ya yinsi. Nge zolaka mona yawu.”

74 “Mbote,” mu tubaka, “Mu vwandaka ya kuvwanda na ditoma yiya- . . .mvula ya mpembe vwandaka ya kifuluka bilumbu yiya, mpe mu banza mu me monaka yawu ntete ve, tata.”

Mpe yandi tubaka, “Mbote mingi. Nge kele na ata mpata na nge?”

Mu tubaka, “Kaka pene ya ba-dollar kumi na zole.”

75 “Mbote,” yandi tubaka, “nge ke vwanda kaka awa tii kuna nge ke futa yawu.” Pene ya ngunga kumi na nkokila, to kumi na mosi.

76 Mu tubaka, “Tata . . .” Mu tubaka na yandi nionso, yina vwandaka tambula mbote ve, mpe musuni mpe nionso yina. Yina zolaka tuba kima mosi ve samu na yandi. Na yina mu zolaka kusine nsamunu mosi ya ntima ya mbote, ti mu ke tinda bawu mbongo.

77 Ntangu mu kumaka na yinzo, mu sonikaka zuzi, ya mwa mbanza yina, mwa nzenza yina mu zolaka fidisa yawu. Mpe mu

tubaka na yandi. Mu tubaka, “Tata, mu tulaka makumi zole na . . . pene ya bamvula makumi zole na tanu,” na ntangu yina, “bamvula makumi zole na sambanu na kati ya kisalu ya Mfumu, na kumekaka na kundimisa bayina ke kufwaka bantu na Mfumu Yesu, samu na kumeka na kukeba luzingu ya beno mutindu kisadi, samu na kumeka kusala bimvuka ya kulutila mbote, mpe kisika ya kulutila mbote samu na kuzinga, mpe bumuntu samu na mabuta ya beto. Mu me tula bamvula makumi zole na tanu na lukutakanu yina. Mpe mu me sabuka kaka ndilulu ya beno. Mu ke kuwa ti nge lendaka lemvočila munu samu na yawu.” Mu tubaka, “Kasi kisadi ya nge lendaka ve kutala, ata fioti ve. Na yina, mu banza ti yandi fwana sala yawu, mpe yandi ke sala bisalu ya yandi. Kasi mu ke yufula beno, mutindu zuzi. Ya kele mbongo ve; ya kele musikulu. Amende ya munu ya ntete na kufuta, mpe yayi fwana basika na mbongo yina bantu pesaka munu samu na kuzinga, na nzila ya dibuundu.” Mu tubaka, “Kana nge ke vwanda mutindu yina samu na kulemvokila munu samu na yawu, mu ke sepela na yawu. Na yina, beno tala chèque yina ba me yidika ve, ti beno lendaka zaba ti ya kele—ya kele mbote mingi.”

<sup>78</sup> Mpangi ya bakala, yandi sonikaka nkumbu ya yandi na zulu ya yawu mpe yandi bakaka yawu, menga ya madidi. Samu na yinki? Samu na yinki? Mpe na yina, na nzila ya politiki, mpe na mutindu ya yimbi, bayankaka na kati ya bawu ke kwenda na kufwa bantu. Yawu yina.

<sup>79</sup> Nzambi ke bika ve Dibundu ya Yandi kuzinga ntangu nyonso na yisi ya bima yango. Mpe yinza kele ya kubeba. Mpe politiki kele ya kubeba. Mpe dibundu kele ya kubeba. Yina beto ke na yawu nsatu, kusala mingi samu na yawu, ya kele bantu yina ke zitisaka Nzambi na kuvukana mpe kubokila Nkumbu ya Mfumu. Yawu yina Branham Tabernacle fwana sala. Oh, mu ke . . .

Mu vwandaka tala kaka mpe mu monaka ti mu vwandaka na mingi na ntuala ya munu.

<sup>80</sup> Mpe na kubanzaka wapi mutindu beto lendaka sikimisa awa, ti wapi mutindu dibundu ke na kukwendaka; wapi mutindu bawu ba me kulumusa bumuntu ya bantu, wapi mutindu bawu ke bika bawu kuzinga, mpe ke kwenda na kubina mpe na rock-and-roll, mpe ke lwata mutindu nyonso bawu zola, mpe—mpe nyonso, mpe ke landila kaka mutindu mosi, milongi yina ke kakulaka.

<sup>81</sup> Yina beto ke na yawu nsatu kele mutindu ya ntama, yina Nzambi tindaka, milongi yina me butuka na Mazulu yina ke tuba Kieleka kukondwa kutala yina yawu ke sala mpasi. Mutindu Jean, yina tubaka, “Ba me tula disoka na nsimbulu ya yinti.” “Mpe konso yinti yina ke butaka ve bambuma ya mbote kele kubasika mpe kulosa yawu na tiya.” Beto kele na nsatu ya

milongi, baprofete mutindu yina, nani ke bula bombe, mpe ke sadila balusambusu ya Nzambi samu na masasi, samu na kupasula, mutindu ya yimbi yayi yina beto ke na kuzingila.

<sup>82</sup> Beno lenda ata fioti ve kubasisa disumu na kulengulaka yawu na mukongo. Beno lenda ata fioti ve kubasisa disumu na nzila ya kulongusaka bantu. Manaka ya beto me beba mpe me lembanaka. Ya kele kaka na nkisi mosi samu na disumu, mpe, ya kele, Klisto kele nkisi yina. Mpe Klisto ve na nzila ya funguna ya mayela, kasi na nzila ya mbotika ya Mpeve-Santu, na Luzingu ya malu-malu mpe kubutuka ya malu-malu. Yina kele kaka nkisi samu na disumu, nkisi kaka samu na yinsi. Ya kele kaka nkisi samu na dibuundu. Ya kele kaka nkisi samu na bantu.

<sup>83</sup> Awa ntama mingi ve. . . Mu banza ti mingi ya beno bantu yina ke zyetaka kuna. Mu vwandaka kuna mpimpa ya muvimba, na nzietelo ya munu kuna na Weste. Na yina mu fwana kwenda na sabala ke kwisa, kubomba mosi, kuzwa kubomba na luyalu samu na kukwenda. Ba me simba munu awa. Kisika, kana ba lendaka fidisa munu, ba lendaka nata munu awa. Mpe mu fwana kwenda na balukutakanu zole kuna na Côte Ouest. Mpe kana Mfumu kuzola, mu ke luta na mwa mbanza yayi ba ke bokilaka West Memphis, na Arkansas. Ya kele kaka na simu yina ya nzadi ya Memphis, na Tennessee. Mpe na kisika yayi ba zolaka sadila mafuku zole na ndambu ya ba-dollars samu na yinzo ya lusambusu, samu na kubula bansaka ya mbongo. Ba-million zole na ndambu ya ba-dollars, samu na kubeba, mpe samu na kubebisa yawu, mpe kufidisa mioyo na difelo. Mpe na yina beno simba bantu mutindu Billy Graham, Oral Roberts, munu mosi, mpe bayina ke na mpasi samu na dyambu ya Klisto, samu na kulutisa mbongo ya mbote na nzila ya dibuundu mosi, mpe zola kupesa bawu bamvula makumi zole na kati ya boloko ya court federale. Ya ke vwandaka ntangu nionso luzolo ya yinza na kusala mutindu yina.

<sup>84</sup> Mu tubaka, “Nge . . . Mu kele na bampangi ya babakala yina vwandaka na boloko ya court federale.”

<sup>85</sup> Mpe mosi ya banzonzi tubaka, “Nge kele na bampangi ya babakala na boloko ya court federale?”

Mu tubaka, “Mu kuzwaka.”

Yandi tubaka, “Nani bawu vwandaka?”

<sup>86</sup> Mu tubaka, “Mosi ya bawu vwandaka Mpangi Jean, na Alabama, na kisanga ya Patmos. Mpe yankaka vwandaka Mpangi Paul, na boloko ya court federale ya Rome. Mpe Mpangi Daniel, yandi vwandaka mpe na yinzo ya boloko.”

<sup>87</sup> Mpe Mpangi Joseph, samu ba fundisaka yandi na kima yina yandi zabaka diambu ve, yandi sadilaka bamvula mingi, na kumekaka na kuvwanda kisadi ya kieleka na Potiphar, mpe kento ya yandi fundaka yandi. Mpe ba fundisaka yandi, mpe vwandaka na kati ya boloko samu na bamvula mingi, tii ba-

moustache ya yandi mpe bansuki ya yandi yelaka, tii yandi lendaka ve. . . Ata mpe zolaka bula yandi, samu na kunata yandi na ntwala ya Pharaon. Kieleka. Samu na yinki, kima ya yimbi? Samu na dyambu ya Klisto! Kieleka!

<sup>88</sup> Mpe na manima ya kubasisa mafuku zole na ndambu ya ba-dollars na ndambu samu na lupangu ya kukima mbangu, samu kubebisa mpe kufundisa mpe kutinda mioyo na difelo. Na kuzonzaka na yina me tala Nzambi kukwiza na nswalu!

<sup>89</sup> Kasi bantu ya Arkansas salaka kima mosi samu na yawu. Konso dibuundu, mu banza, yivwa to kumi ya ba-denomination ya kuswaswana na kimvuka ya bawu, bawu nionso vukanaka mpe tubaka, “Ya kele luvunu. Mpe beto ke kuzwa yawu ve.” Mpe ba salaka lukutakanu ya bisambu, mpe ba ke baka miniololo ya bisambu, kilumbu na manima, mpe na mpimpa na kati mpe na ngaanda. Mpe ntangu bazuzi mpe bantu ya luyalu, mpe bawu nionso kwendaka na yinzo ya lusambusu na suka yina landaka, samu na kusukisa yawu, ata ti ba lendaka tunga yawu to ve, ba kutanaka, mpe ba nungaka yawu. Kisambu ke sobaka bima. Mu ke kipe ve mutindu yinza me pola, wapi mutindu yinsi ya beto me pola, yinsi ya beto kele, bantu ya beto; kisambu ya beto ke sobaka bima.

<sup>90</sup> Kasi beto ke sepelaka diaka ve na lukutakanu ya bisambu. Beto kele na bima mingi yankaka yina beto fwana sala, na yina beto ke banza.

<sup>91</sup> Mpe na yina, yina kaka ve, yina yinzo yina ya lufundusu fundisaka, kasi dyaka ba sonikaka na yawu ti bawu lendaka ve kuzwa, na kizunga ya Arkansas, kima mosi ve mutindu yina bamvula mpe bamvula ke kwiza. Samu na yinki? Samu bantu yina ba me bokila na Nkumbu ya Yandi ke vukana kintwadi mpe ke sambila.

<sup>92</sup> Oh, yina beto ke na yawu nsatu bubu yayi kele lubokilu ya kintwadi, kukubama. Mpe kutala ve na mulongi, kasi beno, mutindu muntu na ntwala ya Nzambi, kukubama samu na Nkwizulu ya Mfumu, samu na kutina kubeba yayi nionso.

<sup>93</sup> Ata ti nionso yina ba ke bokilaka beno, mpe yinki kisalu bawu ke salaka, yina ke sobaka ve Nzambi ata fioti. Nzambi ke sala yawu, kaka mutindu mosi. Yandi ke na kutalaka mpe ke na kuingilaka na beto. Oh, la la!

<sup>94</sup> Bantu yankaka ke tubaka, “Mbote, mu ke kwendaka na dibuundu na Lumingu na suka. Mu ke kuwaka pasteur ya beto, yina kele mulongi ya mbote.” Ya kele mbote. Mu ke sepela na yawu. Mpe beno kele Amerika, yinza, muntu nyonso yina ya kele. Kasi ya ke lomba mingi kulutila nsangu ya mbote na chaire. Ya ke lomba luzingu ya beno. Ya ke lomba beno, na kukubama.

<sup>95</sup> Na Apocalypse kapu 19, mpe nzila ya 7, Biblia me tuba yawu, na kuzonzilaka Kento ya makwela ya Klisto, “Yandi me kubama

Yandi mosi.” Yandi kubamaka Yandi mosi. Mpe beno, mutindu mambele ya Kento ya makwela yayi, beno fwana kubama.

<sup>96</sup> Mwa ntangu fioti me luta, longi mosi vwandaka longa. Mpe—mpe ya vwandaka na muntu yina vwandaka na yinzo-Nzambi ya yandi, oh, mwa ntangu mingi. Mpe yandi kwisaka na suka yina na autel. Mpe yandi tubaka, “Pasteur, mu zola ntangu yayi kupesa kimbangi ya munu mpe kukipesa ya munu na Mfumu Yesu, yina mu salaka mazono na nkokila.”

<sup>97</sup> Mpe pasteur tubaka, “Mbote, mu ke na kiese na kuwa yawu, Jean. Kuzaba ti nge me baka lukanu na nsuka na kukwiza mpe kukipesa nge mosi na Mfumu, samu ti beto zola ve kunyongisa nge, kasi beto zaba ti nge me vwanda yimbi mingi. Mpe beto zaba ti nge me niokula dibuta ya nge. Nge me bebisa mbongo ya nge na bansaka, mpe nge me bebisa yawu, mpe me zinga luzingu ya boma, mpe dibuta ya nge me kwenda kukondwa. Mpe ya ke pesa ntima ya munu kyese, na suka yayi, na kuzaba ti nge me kwisa na ntwala ntangu yayi mpe ke kukipesa nge mosi na Mfumu Yesu, samu na kukuma muntu ya kuswaswana, samu na kusadila Yandi.”

Yandi tubaka, “Matondo na nge, pasteur.”

<sup>98</sup> Yandi tubaka, “Na yina kaka yinki . . . Mu zola kuyufula nge kima mosi. Wapi dilongi mu longaka, to wapi mutindu mu sadilaka, mpe, to wapi nkunga ba vwandaka yimba na dibuundu, na bankunga, yina me sala ti nge baka lukanu ya kusala yayi?”

<sup>99</sup> Mpe mutindu muntu vwandaka tala yandi, na kizizi, na masa ya meso vwandaka kulumuka na matama ya yandi, yandi tubaka, “Pasteur, ya vwandaka ve malongi ya nge, ata ti, mutindu mbote yawu vwandaka. Ya vwandaka ata mosi ve ya chorale yina vwandaka yimba, to ya mutindu yankaka, ata mutindu mbote yawu vwandaka.”

<sup>100</sup> Yandi tubaka, “Na yina nge ke tuba na dibuundu yayi samu na yinki nge me baka lukanu yayi?”

<sup>101</sup> Yandi tubaka, “Mu ke salaka na muntu yina kele Muklisto, mpe mu me tuba nyonso na yandi. Mu bokilaka yandi exalté. Mu bokilaka yandi fanatiki ya musambidi mpe nyonso, mpe ya kwamisaka yandi ata fyoti ve. Kasi yandi zingaka luzingu ya mutindu yina tii na nsuka, na kati ya ntima ya munu, nzila nyonso, yandi nungaka kisika mosi, ti mu zola kuvwanda mutindu muntu yina. Mpe ya kele samu na yina mu lombaka yandi na kutwadisa munu na Klisto. Mu zolaka Klisto yina yandi ke sadilaka.”

<sup>102</sup> Beno me mona, Nzambi ke salaka na nzila ya pasteur, samu na kukubika Dibundu ya Yandi. Yandi ke salaka na nzila ya bankunga, samu na kukubika Dibundu ya Yandi. Mpe Yandi ke salaka na nzila ya beno, samu na kukubika Dibundu ya Yandi.

103 Kana pasteur ya beno ke kubwa, mpe ntangu nyonso ke kubwa, beno ke sosa beno pasteur yankaka. Na nswalu beno ke sala yawu. Kana chorale ya beno me yimba mbote ve, to solo ya beno vwandaka mbote ve, beno ke tuba na ntwadisi, yandi yina kele na miziki, “Beni bika bawu kuyimba dyaka ve. Ba ke pesa munu kaka kidi-kidi, samu na kuyimba.”

104 Kasi wapi mutindu samu na beno mutindu muntu yandi mosi? Wapi mutindu beno ke kondwa na luzingu ya beno ya konso kilumbu? Wapi faso na Nzambi, yina Nzambi me tuba samu na nge na kuvwanda, Nsemo yina ke sema yina kele na zulu ya mongo? Muntu ve lenda luta mutindu yina, mbote, na ziunga ya nzila ya beno, kukondwa kuzaba yina me tala Yesu. Yinki mutindu ya luzingu beno ke zingaka, mosi ya mitindu yayi yina zola kutuba, kufinga, mpe kukipe diambu ve? To, beno lenda tuba na ngemba mpe zola yina beno me mona na kati ya Klisto?

“Yandi me kubama Yandi mosi.”

105 Mu me lakisa beno yimbi. Mpe ntangu zolaka ve. . . zolaka kubwa munu, na kulutaka na bansungi, mpe kulakisa ti konso ntangu, mutindu na Babylone na nkokila ya kudasuka, mpe kubina mpe kunwa, mpe nyonso yina, mpe yina salamaka. Mpe nzila nyonso ya nsungi ya vwandaka mutindu yina. Na konso nsungi Nzambi vwandaka na bapofete ya mutindu ya nzasi, na bidimbu mpe mambu ya ngitukulu, samu na kufundisa kima yina na kati-kati ya kuzabana nionso, mpe kutelema kaka samu na Nzambi.

106 Yina kaka ve, kasi yinki ke salama kana mu lendaka tubila ntangu ya Etienne, profete ve, pasteur ve, kaka mambele ya Nzutu ya Klisto. Mutindu mwa muntu yayi telamaka na ntwala ya Kimvuka ya Bakuluntu na suka yina, mpe zonzaka na bayina vwandaka bedisa yandi, mpe tubaka, “Beni bantu ya yintu ya kukangama, yina kuzwaka ve nzengolo ya ntima mpe makutu. Beni ke teleminaka ntangu nyonso Mpeve-Santu. Mutindu batata ya beno kusalaka, mutindu mosi na beno.” Yandi vwandaka ve pasteur.

107 Beni lenda vingila ve ti pasteur ya beno kusala yawu nyonso. Beni lenda vingila ve conseil ya beno ya ba-administrateur samu na kusala yawu nionso, to kimvuka ya beno ya badiakre. Beni fwana kubama beno mosi. Yawu ke diambu ya beno mosi.

108 Mpe, beno bambuka moyo, Nkwizulu ya Yandi kele na mbala mosi, ti Dibundu ke kwenda na mbwetolo ya disu. Mpe kana beto ke mona disumu bisika nionso, mpe lufundusu me kubama, mpe bamasuwa ya bitumba ya nganzi ya Nzambi ke na kukwisa, wapi mutindu beto ke tina yayi? Bidimbu ke na kumonika. Yesu ke na kwiza. Mpe mambu ya nene ya ngitukulu ke na kusalama. Poto nionso ya nzila ke na kotalisa kumonika ya Yandi ntama ve, mpe ya ke salama na mwa ntangu fioti.



109 Wapi mutindu beto kele ya kutelama, na suka yayi, na yina beto ke na kukifyongonina beto mosi? Kana ba lendaka tuba na beto, na suka yayi, mpe Mfumu Yesu zolaka kulumuka na mazulu, na suka yayi, na Kuboka mpe Makelele ya Nzambi, ba ke mona beto ya kukubama, mutindu nzutu ya dibuundu? Beto ke vwanda ya kukubama, mutindu muntu yandi mosi, samu na kuvukana na bayina me vumbuka na lufwa, yina me kukitalisa bawu mosi ya kukubama? Ata ti beto me kubama to ve, Mfumu Yesu ke kwisa kaka mutindu mosi, na ntangu yina ba me tula. Beto fwana kubama, mpe beto fwana sala yawu ntangu yayi. Ya kele ve ntangu ya kuingila. Beto fwana vulusa ntangu mpe kukubama.

110 Mwa ntangu fioti me luta, disolo mosi (kaka na ntwala ya kumanisa) yina bulaka munu, mutindu mu kuwaka yawu, bamvula mingi, mingi me luta.

111 Kinsweki yayi ya Mfumu; na mbala mosi, kinsweki ya Dibuundu. Beno tala mbote! “Ya ke vwanda na zole na bilanga; mu ke baka mosi mpe ke bika mosi. Ya ke vwanda na zole na mbeto; mu ke baka mosi mpe ke bika mosi.” Na kulakisaka ti Nkwizulu ya Mfumu ke vwanda kaka ve na nsongi mosi, kasi ke vwanda ya yinza ya muvimba. “Mosi ke vwanda na bilanga ya kulonga, na kusalaka,” kilumbu. “Yankaka yina na mbeto, ya kulala,” na lweka yankaka ya yinza. Ya ke vwanda Enlevement ya yinza ya muvimba, mpe ke kwiza na Kuboka, na Ndinga ya Archange, mpe Makelele ya Nzambi ke wakana. Mpe bantu ya kufwa kati na Klisto ke vumbuka na lufwa. Mpe ba ke katula Yandi, na kinsweki. Oh, mu zola yawu! Bakala ya nene ke na kwiza, mpe Kento ya makwela me kubama Yandi mosi, ke vingila kinsweki yina Yandi zaba ve, Yandi mosi. Kasi Yandi me kubama, mpe me lwata bilele, mpe ke vingila yawu.

112 Beto ke mona mikanda ya Yandi na yinza, ti yandi me kubama samu na lusambusu. Beto ke mona bidimbu mpe mambu ya ngitukulu na kati ya Dibuundu, bima ya nene kusalama. Wapi mutindu ya bantu beto zolaka vwanda? Ya kukubama na mwa ntangu fioti, samu beto me zaba ve ntangu Yandi ke Kwisa. “Beno vwanda mpe ya kukubama, samu ti beno zaba ve wapi muniti to ngunga Mfumu ya beno me kwisa.” Beno kubama! Na yina, beno lenda kubama ve na ntangu yina, samu Yandi tubaka ti beno lenda ve.

113 Bantu yikwa na kati ya beno, bawu nionso, me tangaka bamwense? Bayankaka vwandaka na ndwenga mpe bayankaka vwandaka bazoba. *Mwense* zola kutuba “kuvedila.” Bawu nyonso vwandaka bantu ya mbote. Mosi na mosi ya bawu, mwense, ba-vaze ya kusantisama ya Nzambi. Kasi bayina vwandaka na Mafuta na minda ya bawu, bawu kotaka, mpe bayankaka bikanaka. Bawu nyonso vwandaka bamwense, mosi na mosi. Bantu yina beno lenda tula musapi ya beno ve, samu na kima ya yimbi. Bawu, bawu nionso, kwikilaka na Nkwizulu

ya Mfumu. Ba vwandaka ya kukubama na kukwenda kutana na Yandi, kasi bayankaka ya bawu bikaka Mafuta ya bawu kubasika.

<sup>114</sup> Beno bika ve yawu kuvwanda dyambu ya beno. Beno bumba Mafuta na mwinda ya beno. Mafuta kele Mpeve, Mpeve-Santu. Beno bika Yawu ata fioti ve kukwenda ntama na beno. Ntangu beno ke kuwa zola ya beno ke na kufwa, kieleka ya beno na Klisto mpe na Dyambu, na nswalu nionso beno kwenda na Yandi Yina kele na yinto ya Mafuta, mpe sumba samu na beno mosi kifuluka ya Mpeve-Santu.

<sup>115</sup> Yinsi ya beto me beba, na bumuntu ya kupola mpe ya kubeba. Bapolitiki ya beto, ya kubeba mpe ya kufwa. Bantwadisi ya beto, O Nzambi, yinki beto lenda sala samu na yawu? Beno lenda tula muntu ya mbote na kati, mpe yandi ke basika muyibi.

<sup>116</sup> Ya kele kaka na Mosi yina beto lenda nata ntangu yayi, ya kele Mfumu Yesu. Beto kubama samu na Nkwizulu ya Yandi.

<sup>117</sup> Mu zola kutuba na beno mwa disolo yina mu kuwaka mwa bamvula me luta; na bukebi. Na mbala mosi, Enlevement ya Dibuundu!

<sup>118</sup> Ntangu yayi beno ke tuba, “Bima yankaka ke salama, na yina mu ke kubama.” Beno kubama ntangu yayi. Mu me tuba kaka na beno na Pearl Harbor mpe bisika mingi kisika bawu mangaka na kuwa malongi. Bawu mangaka na kuwa yawu. Kima ve bikanaka kasi lufundusu ya Kinzambi na zulu ya bantu. Ntangu yayi, nyonso yina ke kota ve na Klisto ke vwanda na yisi ya nganzi ya Nzambi mpe lufundusu ya Kinzambi. Lemvo beno bika ve yawu kusalama na beno.

<sup>119</sup> Ata ti nyonso yina Branham Tabernacle ke kuma, beno bika yawu kuvwanda ve beno. Beno vwanda kisadi ya Klisto. Ata ti yina dibuundu ya yinza ke sala, beno vwanda kisadi ya Klisto. Ya me tala ve Branham Tabernacle, to dyaka ya me kuma dibuundu mosi yankaka. Ya me tala beno, mutindu muntu, samu na kukubama na Nkwizulu ya Mfumu. Beno fwana vwanda ya kukubama. Mu fwana vwanda ya kukubama. Mu ke kombola ya munu mosi. Ya me kuma na zulu ya beno samu na kukombola bimatini ya beno. Beno bika ya munu swi; mu ke bika ya beno swi. Beno fwana kukubika bilele ya beno.

<sup>120</sup> Ya vwandaka na kisadi-bilanga ya nene, mpe yandi kuzwaka kilanga ya nene ya banzoko, ntama kuna na kati ya kitini ya node ya Colorado, pene ya kitini ya mongo.

<sup>121</sup> Mutindu beno nyonso zaba, mu salaka mwa elevage na luzingu ya munu, na kutambulaka na mpunda mpe nyonso yina. Mosi ya balubokilu ya munu na Nzambi, vwandaka kuvwanda na zulu ya basapatu ya ntama ya piné ya Texas, na munduki mosi ya kutulula na zulu ya kiti ya mpunda mpe pistolet na lweka ya munu; ntangu mu kuwaka bayinti yango ke ningana na

mupepe, muingu mutindu Ndinga tubaka, “Adam, wapi kisika nge kele?”

<sup>122</sup> Mpe ntangu mu talaka bambwetete, mpe mu kuwaka kiboba Slim, cowboy mosi ya kiboba kuna na Texas, na kutulaka mupepe na kati ya kombo na kitini mosi ya papié (Kuna na kulunsi kisika Mvulusi ya munu kufwaka, ya vwandaka kuna samu na kuvedisa munu na disumu; Kuna na ntima ya munu vwandaka Menga ya Yandi yina ba tulaka; Nkembo na Nkumbu ya Yandi), Mu bendaka bulanketi na kizizi ya munu mpe mekaka na kubumbama munu mosi, samu ti Nzambi vwandaka tala na yisi ya myongo yango.

<sup>123</sup> Ya vwandaka na mosi ya bilanga yayi, kisika bakompani ya nene ya ba-embalage vwandaka sumba bibulu ya bawu, ba vwandaka nata bawu na kati ya miongo, mpe na manima ba vwandaka basisa bawu na manima bana ya bangombe vwandaka butuka, na kati—na kati ya automne ya mvula, mpe ba vwandaka tula bawu bidimbu, mpe ba vwandaka teka ndambu ya kimvuka ya bibulu ya ntama, mpe bana ya bangombe ya nzengolo mpe nionso yina, mpe vwandaka kwenda na ntuala na kati ya . . . vwandaka kutika bimvuka ya bawu ya nene ya bibulu.

<sup>124</sup> Mpe na kati ya kilanga mosi yayi, munkwa ya yawu, to mukebi, yina beto ke bokilaka kuna, “Yintu,” contremaître, yandi vwandaka na bana ya bakento tanu. Bawu nionso vwandaka bakento ya kitoko, ya bantwenia, yina me kwelaka ve.

<sup>125</sup> Mpe ya vwandaka na mwa ntwenya ya mama mosi kuna, yina vwandaka cousine ya bana-bakento yayi, ti tata ya yandi mpe mama ya yandi me kufwaka. Mpe ba nataka yandi kuna samu na kuvwanda . . . samu na kuzinga na noko ya yandi—ya yandi.

<sup>126</sup> Mpe bana ya bakento yayi, ti bawu vwandaka na kati ya bilele ya kulutila kitoko, beno zaba, mpe—mpe—mpe bawu bakaka kaka mwa mwana ya kento yayi ya mputu mpe bawu salaka kaka yandi mutindu yandi vwandaka mwa kibulu mosi. Bisalu nionso ya ngolo vwandaka kaka na zulu ya yandi. Yandi vwandaka sukula malonga. Yandi vwandaka kombula. Yandi vwandaka yidika bambeto. Yandi—yandi vwandaka sala yawu nionso. Mpe bawu vwandaka bikana kaka kuna na manzaka ya kulengula mpe manicure, bima yina na zulu ya bikoba ya bawu, mpe bawu nionso ya kukubama, beno zaba, na manzaka ya kulengula.

<sup>127</sup> Mpe mingi-mingi bawu salaka yayi ntangu bawu kuwaka yawu na Chicago, kompani ya nene ya embalage yina vwandaka na kimvuka ya bantu, mwana ya yandi ya bakala ya ntwenya, yina me kwelaka ve vwandaka kwisa kutala kilanga. Oh, bawu basikaka na bilele ya mbote! Ah! Mpe bawu lwataka mpe kubamaka samu na nkwezulu ya yandi! Mpe konso nokila masolo zolaka vwanda, ba zolaka kupukumuna ntwenya yayi ya

bakala mpe kukwela yandi. Yina zolaka . . . Na yina bawu zolaka kuzwa kilanga, bawu mosi, samu mwana ya bakala yango zolaka kuma kilandi ya difwa samu na nionso. Na yina bawu kubamaka bawu mosi.

<sup>128</sup> Na yawu, beno me mona, ya kele na kukubama na kusala. Beno kubama beno mosi, na kukumaka ya dibuundu to kima mosi, kaka yina ba me lomba. Beno fwana kuzwa Mafuta na mwinda ya beno. Beno me mona? Beno lwata kaka bilele ya beno, beno tuba, “Beto ke tunga dibuundu ya nene. Beto ke vwanda na denomination ya kulutila kitoko. Beto ke—beto ke kuzwa mwa orgue, na Mfumu. Beto ke sala bakiti mingi.” Ya kele ve yina Nzambi ke lomba.

<sup>129</sup> Ludedomo kele yina Nzambi ke lomba, na kati ya Mwana ya Yandi, Klisto Yesu. Ya kele bilele. Samu ti Biblia ke tuba, “Bilele ya mpembe yina yandi me kubika, kele ludedomo ya basantu.” Na yawu yandi . . .

<sup>130</sup> Bana ya bakento yayi banzaka ti bawu ke kubama samu na nkwezulu ya ntwenya ya bakala yayi. Na yina, cousine yina ya ntwenya ya mputu, yina ke bambuka munu moyo ya muntu yina ba me losa kisika mosi kuna. Beno lenda sepela na yandi. Yandi vwandaka kento mosi ya kitoko. Kasi, oh, la la! Yandi vwandaka mwana ya kento mosi ya mbote, kasi ba talaka yandi ve na kati-kati ya bawu, ve mutindu mpangi ya bakala.

<sup>131</sup> Ntangu yayi yina kele mutindu foto ya kieleka ya Dibuundu ya kieleka, bubu yayi, na ntwala ya ba-denomination. [Kisika ya mpamba na bande—Mu.] Ata kutala ba ke talaka yandi ve; nkonga ya bantu yina ke yambaka bantu nionso, nkonga ya bantu yina ba me losa.

<sup>132</sup> Na yawu mwa muntu ya mawa yayi kwendaka kaka na ntwala, na kusalaka. Mpe ntangu ntwenya ya bakala kwizaka . . .

<sup>133</sup> Bawu zabaka yawu ve, kasi yandi kwisaka sosa kento ya yandi. Yandi vwandaka mbevo mpe ya kulemba samu na mbanza bana-bakento yina bikanaka bawu nionso ya kulwata, mpe, oh, beno zaba, ya vwandaka na banganda, mpe ya vwandaka tambula na ba-Cadillac, mpe bima ya mutindu na mutindu. Bawu—bawu vwandaka kaka ya kubela mpe ya kulemba samu na yawu. Yandi banzaka, “Mu ke kwenda na Wesete mpe ke zomba munu mwana ya kento ya kieleka yina ke vwanda mama ya kieleka samu na ba-bébé ya munu. Mpe muntu yina lendaka kwenda ata fioti ve na bimbuka yina ke tungaka bilele mpe—mpe ba-sociétés mpe bima, kasi ke vwanda kaka mama ya kieleka.” Yinki yandi monaka ntangu yandi kumaka kuna, kasi kima mosi yina yandi fundisaka na Chicago?

<sup>134</sup> Mu ke kukiyufula kana Mfumu Yesu ke kuzwa dibuundu, kaka denomination, kaka na nkumbu, “dibuundu,” ve Mafuta na minda, ya kukubama ve na kukwenda? Oh, bawu kele na matiti ya mbote. Bawu kele na mabuundu ya kulutila nene, *yayi* ya

kulutila nene, mpe bima yayi nionso. Kasi Nzambi zola yawu ve. Yandi zola beno mutindu muntu yandi mosi. Ba lendaka vwanda na ba-pasteur ya kulutila mbote, ba lendaka vwanda na ba-diacre ya kulutila kitoko, kasi Yandi zola ti beno vwanda na Mafuta. Yandi ke kwisa samu na kusimba Mafuta yina mpe Kento ya makwela.

<sup>135</sup> Mpe mutindu yandi, mwana ya bakala yayi, talaka bawu, yandi vwandaka na mawa. Mpe na nkokila yina ba vwandaka sala kima mosi na ndonga . . . Na bilumbu yina, ntama mingi ve, ba bokilaka “Charlestown,” yina kele kaka mutindu rock-and-roll. Mpe ba zolaka losa mosi ya mikembo yango ya nene. Mingi na kati ya beno ke bambuka moyo na makinu yina ya ntama ya Charlestown yina bawu salaka, kuna ntangu mu vwandaka mwana ya fioti, ntangu mu vwandaka kuna. Mpe na yina bawu nionso vwandaka na mwa bilele ya bawu ya ndombe mpe ya mpembe, beno zaba, samu na kusala . . . Oh, ba vwandaka bokila yawu “Charlestons,” mpe “black bottom.” Yawu yina ba vwandaka bokila. Mpe ba vwandaka na bilele zole ya ba-tonne zole, mpe ba vwandaka sala makinu yayi.

<sup>136</sup> Mpe, kasi, mwana ya bakala yayi vwandaka ya kubela na kima yina. Yandi vwandaka sosa mwana ya kento ya kieleka, na yawu yandi basikaka na feti ya bawu. Yandi vwandaka tala bawu mbote. Yandi kwendaka kutala bawu.

<sup>137</sup> Mutindu mosi kele Mwana yankaka yina mu zaba. Mwana yankaka ke kwisa na dibuundu ya beno. Yandi ke . . . Mwana ya Nzambi, Yandi ke kwisa kuna. Yandi ke tala na nziunga. Yandi ke mona ti beno kele ya kulwata mbote. Yandi ke—Yandi ke zaba ti beno kele mambele ya mbote. Kasi Yandi ke sosa kima ya luswaswanu na dibuundu ya ntangu nionso.

<sup>138</sup> Na yina mutindu yandi talaka na nziunga, na manima ya mwa ntangu fioti, yandi lembaka nzutu. Yandi basikaka na kielo.

<sup>139</sup> Mpe na kuvutukaka, na kutambulaka na kati ya nsemo ya ngonda, na ntwala ya yinzo ya banzenza, yandi kuwaka muntu mosi ke na kuniunguta. Mpe yandi talaka pene-pene. Mpe awa kwendaka ntwenya ya mwana kento yayi na dilonga ya nene ya masa samu na kusukula malonga, kuna na nkokila, makulu mwasi, samu na kulosa maza ya yintu. Mpe kaka na ntangu yandi monaka yandi, kima yankaka tubaka, “Ya kele yandi. Ya kele yina.” Na yawu yandi tulaka yandi mosi na nzila. Mpe ntangu yandi . . . Ya kele ntangu yandi vutukaka na lupangu ya corral, na yina, yandi vwandaka ya kutelama kuna. Mpe yandi zolaka pema dyaka ve.

<sup>140</sup> Yandi tubaka, “Wapi faso?” Mpe yandi tubaka, “Yinki kele nkumbu ya nge?” Mpe yandi tubaka na yandi nkumbu ya yandi, mpe ya vwandaka nkumbu mosi ya mfumu ya kilanga. Yandi tubaka, “Na yina mu lenda bakula ve mutindu ti yayi . . . Ya kele tata ya nge?”

141 Yandi tubaka, “Ve. Mu kele kaka cousine, beno me mona. Tata ya munu mpe yandi vwandaka bampangi ya babakala. Mu kele na nkumbu mosi. Kasi mu . . . Ti, yina kele mfumu ya kisalu.”

142 Beno lendaka vwanda na nkumbu ya dibuundu, lendaka vwanda na nkumbu ya Branham Tabernacle, to ba-Methodiste, to konso dibuundu yina beno ke kwenda. Ya kele yawu ve, nkundi. Beno me mona? Ya kele kima yankaka. Ya kele nkadulu ya beno. Ya kele yina Nzambi ke talaka. Beno lendaka vwanda ba-Methodiste. Beno lendaka vwanda ba-Baptiste. Beno lendaka vwanda ba-Presbytérien. Ya kele yawu ve. Ya kele nkadulu yina Nzambi ke talaka. Ya kele ve kaka kikalulu ya ntoto, kasi nkadulu ya Mpeve-Santu. “Bidimbu yayi ke landa bayina ke kwikila,” tubaka Yesu, na kapu ya 16 ya Santu Marc.

143 Yandi kuzwaka yawu—ti yandi zolaka zonza na yandi, mpe. Mpe yandi tululaka yintu ya yandi, mpe yandi kwendaka mbangu na yinzo.

144 Yandi vwandaka kuna sabala mosi to zole, mpe yandi talaka bisika nionso, bisika nionso. Mpe yandi tubaka diaka ve, kasi yandi landilaka kaka na kutala yandi. Mpe nkokila yina na ntuala yandi kwenda. . . Yandi zolaka kwenda na suka yina vwandaka landa. Ba vwandaka losa feti yankaka ya nene. Mpe yandi vwandaka tala yandi mbote. Yandi vwandaka mona yandi ve. Yandi zabaka ti yandi zolaka sukula banzungu mpe nionso yankaka, na yina, kisalu ya mvindu mpe nionso ke katuka.

145 Mpe ya kele mutindu Dibuundu ya kieleka ya Nzambi fwana baka yawu ntangu yankaka, kisalu ya mvindu, bankumbu nionso ya nsoni, mpe nionso ya bima yina ya zola kutuba, losamaka na zulu ya Yawu. Mpe Yandi kele ndeke mosi ya nene. Bandeke nionso yankaka ke vukana pene-pene mpe mameme na Yandi. Ya kele mbote mingi. Nkumbu ya yandi kele na Buku ya Luzingu ya Mwana-dimeme. Yandi ke mwangisa nsinga ya Yandi ya nene kilumbu mosi samu na kupumbuka. Yandi me kubama. Mwa bitini yina zolaka kutuba Menga ya Klisto yina ba me mwangisa na zulu ya Yandi. Beno me mona? Beno me tangaka yawu na kati ya Buku ya beno, Biblia.

146 Mpe mwana-bakala yayi bakaka kento yayi ya ntwenya na nkokila yina mpe bawu kwendaka. Yandi tubaka, “Mu vwandaka tala nge mbote. Muntu mosi ve zaba yawu kasi munu mosi.” Yandi tubaka, “Mu me kwisa awa samu na kusosa kento ya munu. Mpe nionso yina mu me monaka ntete ve, beno ke zitisa misiku.” Wapi mutindu yandi kuwaka? Mwana ya bakala ya nene yufulaka yandi ntangu yayi kana yandi ke vwanda kento ya yandi.

147 Beno banza kaka mutindu bana ya bakento yina zolaka kuwa na ntangu bawu talaka na nela ya bawu mpe monaka, me simbana na maboko, na cousine yina ya ntwenya, yina ba

vwezaka, bakala yina ba vwandaka meka na kupukumuna, na ba-robe ya bawu nionso ya nene mpe bilunga, mpe bisala-sala.

Mpe yandi tubaka, “Nge zola kukwela munu?”

“Oh,” yandi tubaka, “tata, mu kele ya kulunga ve.”

<sup>148</sup> Ya kele mutindu Dibuundu ya kieleka ke kuwaka yawu, “Mu kele ya kulunga ve. Mu lenda . . . Kana mu lendaka sukula kaka malonga ya Nge, ya ke vwanda mbote mingi.” Beno zola baka kisika yina? Beno lenda sukula malonga na Madia ya nkokila? Beno zola ti ba bokila beno fanatiki? To, beno zola kuvwanda na nzila na mwa bantu ya kiadi ya Mfumu? Beno zola?

<sup>149</sup> Beno zola, na kisalu ya beno, samu na kutula kidimbu, “Ya kele na muntu, yandi kele fanatiki ya musambidi, samu yandi ke kunwa malafu ve, yandi ke kunwa makaya ve, yandi ke kina ve, yandi ke tambula ve na bakento”? “Ya kele na kento yina ke bumbaka yintu ya yandi, yandi ke tambula mutindu . . . kuna na kati ya mbanza. Yandi kele ve . . . Yandi ke kota ve na baselekele ya beto”?

<sup>150</sup> Beno zola baka nzila, beno kubama samu na Nkwizulu ya Mfumu? Kana beno ke . . . Kana beno sala yawu, beno ke vingila Yandi kwisa. Beno ke sepela na Kwizulu ya Yandi. Ya ke vwanda ve kima ya boma. Ya ke vwanda ntangu ya kulutula lemvo yina beno lenda banza, Nkwizulu ya Mfumu. “Bayina nionso ke zolaka kumonika ya Yandi.”

<sup>151</sup> Na yawu, ntangu yandi kwendaka, yandi tubaka na yandi ti yandi ke vutuka na ntangu mosi. Yandi tubaka, “Ntangu beno ke banda na kumona . . .” Ya vwandaka hiver. Yandi tubaka, “Ntangu beno ke banda na kumona bayinti yango kubanda na makasa, kuna, mesquite mpe bima ke banda na kubaka luzingu ya malu-malu,” yandi tubaka, “na yina mu ke vutuka na ntangu ya printemps.”

<sup>152</sup> Mu me bakula, mu lendaka tuba ve ti ya vwandaka kieleka, kasi mwana-kento yango vwandaka kaka na dollar mosi mpe ba-centime makumi sambwadi na tanu sabala mosi samu na kisalu ya yandi. Kasi yandi vulusaka mbongo nionso ya yawu. Samu na yinki? Yandi vwandaka kubama samu na makwela yina vwandaka. Yandi vwandaka vulusa mbongo ya yandi samu na robe ya yandi ya makwela. Samu yandi tubaka, “Beto ke kwelana kaka awa na kilanga ntangu mu ke kwisa diaka.” Yandi vulusaka mbongo ya yandi konso mvula. Yandi vwandaka na kiese. Yandi vwandaka ve na mabanza ya kusukula malonga. Yandi bambukaka ve kugoma bilele, to kukombula yinzo ya banzenza, to yina yankaka. Yandi vwandaka fiancée na mfumu ya bilanga.

<sup>153</sup> Yinki beto ke kipe yina yinza ke tuba, Muklisto ya kieleka? Yinki beto ke kipe kana ba fwana vweza beto mpe kumanga beto? “Kyese na bantu ya lembami, samu ti bawu ke byadila ntoto.” Mwana ya Mfumu ke na kwiza, kilumbu mosi, mpe beto

ke kwenda na Kudya ya Makwela. Wapi luswaswanu ya ke sala na beto, kana beno zola kumonana ya Yandi?

<sup>154</sup> Na manima ya nyonso vwandaka . . . Bilumbu lutaka. Bana ya fyoti ya bakento, mwa ba- cousin ya yandi, kusekaka yandi, binaka pene-pene ya yandi, mpe salaka nyonso yankaka. “Mbote,” yandi tubaka, “nge muntu ya mawa, muntu ya buzoba! Nge zaba ve kana yandi . . . Na yina, yandi vwandaka kaka mutindu bantu nyonso yankaka. Yandi vwandaka sakana kaka na nge.”

<sup>155</sup> Kasi Mwana ya Nzambi ke kotisaka ve. “Kana muntu butuka mbala zole ve, yandi ke vwanda na ndwenga ve . . .” Mu ke kipe ve wapi mutindu beno ke tala mbote, wapi mutindu dibuundu beno kele, wapi mutindu biteki ya beno kele na yinsi. Beno lendaka vwanda muntu ya politiki. Beno lendaka vwanda na luyalu ya court federale. Beno lendaka vwanda na Katolika, na ba-Presbytérien, na dibuundu nyonso yina beno zola kuvwanda. Kasi, ya kele, “Kana ti muntu kubutama dyaka, beno ke kota ve. Mpe bidimbu yayi ke landa bayina ke kwikila.” Mu ke na kutanga kaka Ndinga ya Yandi.

<sup>156</sup> Na nsuka, ntangu ngunga kwizaka, yandi bandaka na kumona yayi, makasa bandaka na kukwiza na bayinti. Yandi zabaka ti yandi ke vwanda kuna na konso ntangu yina. Mpe yandi tubaka, “Mu ke meka na kusala yawu kaka na kati ya mwini, samu ti beto kwelana mpe kusala nswalu.” Mpe konso nkokila, na mwini, ntangu yandi—yandi ke kwenda mpe ke kwenda, ke kubama yandi mosi, ke lwata lele ya yandi ya makwela, mpe ke vingila na mwelo.

<sup>157</sup> Mpe mwa ba-cousine yayi kwizaka mpe sekaka yandi, mpe kuseka yandi, mpe tubaka, “Nge muntu ya mputu, muntu ya buzoba, yina zaba dyambu ve. Kubanza ti bakala yina kele na . . . Yandi kele Président mu zola kutuba, ya kompani, ti mwana-bakala yayi zolaka kukwela muntu yina ke sukulaka banzungu!”

<sup>158</sup> Yandi vwandaka sosa ngolo, bilele ve. Yandi vwandaka na mbongo mingi samu na kusumba bilele nionso vwandaka mfunu.

<sup>159</sup> Nzambi ke kipe ve bima ya nene beno kele na yawu. Yandi kele na nyonso na yinza. Na yawu, Yandi zola ngolo. Yandi zola kima yina kele kieleka.

<sup>160</sup> Mpe na yawu, na nsuka, nkokila mosi, na yina yandi vwandaka ya kutelama kuna, mpe bawu vwandaka seka mpe vwandaka sawula yandi, mpe vwandaka tuba na yandi ti yandi vwandaka muntu ya buzoba. Na mbala mosi, bawu kuwaka makelele ya ba-sabot ya bampunda. Yinki salamaka? Na simu yina ya mongo vwandaka kwisa pusu mosi. Ntangu yayi, pusu mosi ya bakala kele mwa pusu mosi, ya kuzibuka, ya kuzabana mingi na Weste. Mpe bampunda nionso vwandaka sala makelele mpe nionso, na kukwisaka. Na simu ya mongo, kwisaka pusu



yayi, mpe yawu telemaka na ntwala ya mwelo. Mpe yandi kimaka mbangu. Yandi tubaka, “Mu zabaka ti nge ke kwisa.”

Ya fwana wanda Dibuundu kilumbu mosi.

<sup>161</sup> Kento lemukaka yandi mosi na maboko ya yandi, mpe yandi tubaka, “Cherie, mu me kuzwa bakala mosi telemaka kuna na kilanga yayi kubanda mu katukaka awa na mvula me luta, yina natinaka munu nsangu ya bima nionso yina nge salaka.”

<sup>162</sup> Nzambi kele na Muntu mosi kuna na tabernacle yayi, na suka yayi, ba me bokila Yandi Mpeve-Santu. Yandi zaba binsweki ya ntima ya beno. Yandi zaba nionso yina beno salaka, to yina beno ke banza. Yandi ke tuba na Tata nyonso yina beno ke sala. Yandi ke nata nsangu mpe nyonso yina.

<sup>163</sup> Yandi tubaka, “Mpe yandi tubaka na munu ti nge me vingila, mpe nge me sala, mpe nge me sala na mvibudulu nionso, na kuvingilaka ti mu kwisa. Ntangu yayi, beno vwandaka mpika kubanda ntama, kasi ntangu yayi bilumbu ya beno ya kimpika me suka. Mu me nata mulongi, kaka na yisi ya dibulu yayi ya rose, nge me kuma kento ya munu.” Yandi yambaka yandi, yandi lwataka lupete ya makwela na musapi ya yandi, mpe bakaka yandi mpe tulaka yandi na kati ya pusu, na diboko ya yandi na zulu ya yandi. Mpe nataka yandi, samu na kumona yinzo ya kintinu yayi ya nene ya malu-malu kuna na Bala-bala ya Nene na Chicago, yina ba soolaka samu na yinsi, kisika yandi lendaka zinga mutindu kento ya yandi ya makwela.

<sup>164</sup> Samu na yinki? Yandi vwandaka ya kukubama. Yandi zingaka mpe vwandaka mutindu ya kento yina yandi zolaka. Ya salamaka kaka na ntangu yina.

<sup>165</sup> Mpe na mbala mosi, Nkwizulu ya kinsweki ya Mfumu, yinza zaba ve ti ya ke salama, kasi beto ke sala yawu. Ya me kuma pene-pene. Kuvwanda ve mutindu ntwenya ya mama yina bawu katulaka bilele, na Pearl Harbor, beno ke kwenda na nsoni. Beno vwanda mutindu Yandi yina salaka Yandi mosi kukubama, mpe bumbaka bangolo ya Yandi, mpe vwandaka vingila Nkwizulu ya Mfumu, samu ti ya ke vwanda kinsweki mpe na mbala mosi.

<sup>166</sup> Na yina beno ke banza na bima yina, beto kulumusa bayintu ya beto na Yandi Yina ke kwisa.

<sup>167</sup> Kaka ntete beto zonza na Yandi, bakala nyonso na mutindu ya yandi mosi, kento nyonso, mwana ya bakala, to mwana ya kento. Mpe na yina mu ke tuba na Yandi mpe mu zaba ti Kisadi ya Yandi ya kinsweki, Yandi yina beno lenda mona ve na disu ya beno, na yina Yandi kele Kisadi ya kinsweki, Mpeve-Santu ya kusakumuka kele na kati ya yinzo yayi ya nene. Beno zola Yandi kubambuka moyo na beno na ntwala ya Tata, na suka yayi, ti beno zola kukubama, mpe ntangu Yandi ke kwisa, samu na kukwenda na Yandi? Kana beno zola, beno zola kutelemisa diboko ya beno na Yandi? Mfumu sakumuna beno. Mu banza ti konso diboko na kati ya yinzo; ya munu, mpe. “Mu zola

Nge, Mpeve-Santu, kutuba na Tata, “Tala munu. Mu ke—mu ke tambula na bantu ya Yandi ya kiadi. Mu—mu zola kwenda, mu zola kukubama. Mu—mu zola kukubama kaka ntangu yayi, samu ti Yandi lendaka kwiza ntete lukutakanu kumanisa.”

Bayinsi ke na kupanzana, Israel ke na kuboka,  
Bidimbu yina baprofete zabisaka na ntwala;  
Ba me tanga bilumbu ya Bantu ya makanda, ba  
me fuluka na boma;  
“Vutuka, O nge yina me zimbana, na yina ya  
nge.”

Kilumbu ya mpulusu me belama,  
Bantima ya bantu ke na kubwa na boma;  
Beno vwanda ya kifuluka na Mpeve ya  
Nzambi, minda ya beno ya kuyilama mpe ke  
sema,

Beno tala na zulu! Mpulusu ya beno me  
belama.

Yinti ya fike ke na kukula; Israel ke na  
kubasika dyaka.

<sup>168</sup> O Nzambi! Yinti ya fike ke basisa makasa ya yawu, Israël ke na kuvutukaka mutindu yinsi! Ntangu mu kuwaka pasteur ya beto na suka yayi, kuzonza, kusambila samu na Israël! Beno zaba ve ti ya kele kubasisa makasa? Yandi ke kwiza na ntangu yina.

<sup>169</sup> Na kumonaka ti *Baminuti Tatu Me Bikana Na ntwala Ya Kati-kati Ya Mpimpa*, mukanda yango zulunale yayi, na kumonaka yawu na zulu—na zulu ya camera ya munu, na projecteur na kati ya sous-sol ya munu, ntangu ba-Juif yina ya ntama bikata mpe kotaka na masuwa mpe nionso yina, yina katukaka na yinza ya movimba. Muntu yina ya ba masolo tubaka, “Nge ke kwisa na yinsi ya nge, samu na kufwa na yinsi ya nge?” Yandi tubaka, “Ve. Beto me kwisa mona Mesiya.”

<sup>170</sup> Yinti ya fike ke na kukula. Beno lenda mona yawu ve? Kilumbu ya Mpulusu me belama.

Baprofete ya luvunu ke na kuvunaka, ba ke  
manga Kieleka ya Nzambi,  
Ti Yesu Klisto kele Nzambi ya beto;

Beno lenda mona ve kisika beto kele?

Kasi beto ke tambula kisika bantumwa  
tambulaka.


Kilumbu ya mpulusu me belama,  
Bantima ya bantu ke na kubwa na boma; (Beno  
banza na yawu!)

Beno vwanda ya kifuluka na Mpeve ya  
Nzambi, minda ya beno ya kuyilama mpe ke  
sema,

Beno tala na zulu! Mpulusu ya beno me belama.

<sup>171</sup> Mfumu Nzambi, na kati ya ntangu yayi ya nene, kisika mu ke tala mwa dibuundu yayi ya fioti mpe mu ke mona bazizi ya mbwaki mpe matama na batasi ya masa ya meso, beto me zaba ti Kisadi ya nene me telama pene-pene, Mpeve-Santu.

<sup>172</sup> Ntangu yayi beto baka nzila na mwa bantu ya kiadi ya Mfumu. Kana ya kele na mwa poto na bamfinangani ya beto, na kati-kati ya bantu, na kati-kati ya dibuundu, to kisika nyonso ya kele, yina kele na kima ve ya kusala na beto. Beto ke sumuna ve bilele ya beto na bima ya yinza, diaka ve. Samu Nge ke kwisa kilumbu mosi na mwa ntangu fioti, na mbwetolo ya disu, na mbala mosi, na Enlevement ya Dibundu ya Nge. Beno ke kwiza na zulu ya mongo ya ntangu, na yisi ya mukyama ya kulutila mbote, samu na kukatula Dibundu, samu ti Masonuku ke tuba, "Makelele ya Nzambi ke wakana. Mpe bantu ya kufwa na Klisto ke vumbuka na lufwa. Mpe beto ke zanguka na bawu, na zulu, samu na kukutana na Mfumu, mpe ntangu nyonso kuvwanda na Mfumu. Na yina, bampangi ya munu, beno pesa kikesa mosi na yankaka na bandinga yayi."

<sup>173</sup> Bika ti yawu wakana mudindu na kati ya bantima ya dibuundu yayi na suka yayi. Beto ke kumisa Nge na Nkumbu ya Yesu. Amen. 

58-1012 Kukwenda Ya Kintulumukina, Ya Kinsweki Ya Dibuundu  
Branham Tabernacle  
Jeffersonville, Indiana U.S.A.

KIKONGO-KITUBA

©2024 VGR, ALL RIGHTS RESERVED

VOICE OF GOD RECORDINGS  
P.O. BOX 950, JEFFERSONVILLE, INDIANA 47131 U.S.A.  
[www.branham.org](http://www.branham.org)

## Luzabusu samu na kubasisa mikanda

Muswa nionso kele ya yandi. Muntu nionso lenda kubasisa buku yayi na masini ya yandi ya yinzo samu na yandi mosi, to kukabula yawu ya mpamba, mutindu kiasadilu samu na kumwangisa Nsangu ya mbote ya Yesu Klisto. Ba lenda tekisa buku yayi ve, kubasisa yawu na lutangu ya kulutila mingi, kutula yawu na site internet, kubumbisa yawu na kibumbulu ya bansangu, kubangula yawu na bandinga yankaka, to kulomba mbongo kukondwa muswa yina me sonama na Voice Of God Recordings®.

Na yina me tadila bansangu ya kulutila mingi to samu na yina me tadila bisadulu, beno sonikila:

VOICE OF GOD RECORDINGS

P.O. Box 950, JEFFERSONVILLE, INDIANA 47131 U.S.A.

[www.branham.org](http://www.branham.org)